

### तुबारि संपादकीय टीम

◆ अस इ उम्मिद करं लगे से कि एण बाडे दिन अन्तर सुआ मेहणु इस कम अन्तर सहयोग कते।

◆ इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगि घाटि अन्तर पढ़ू जे इ पत्रिका शुरु क्रिओ सि।

◆ तुबारि यक अवाणिज्यिक पत्रिका भो।

◆ तुबारि पत्रिका कोइ मेहणु, जनजाति, त संस्कृति जे गलति कडेण जे नेई छपाण लगे। अगर कोइ ई सोचता बि त अस जिम्मेवार नेई।

◆ छपाणे पेहले सोभ आर्टिकल दुई टाई पांगेइ मेहणु हरालो असे। इ त खुलि बोक असि कि पेहिल वार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆ आर्टिकलस ना मिएल, या घाटि मेहणु के मदद ना मिएल त तुबारि पत्रिका कदि बि बंद भुइ सक्ति।

◆ कोइ चिज छपां सि या नेई छपां जे तुबारि संपादकीय टीमे पुरा अधिकार असा।

◆ अस सोभि पांगि मेहणु जे हात जोड कई निवेदन कते कि, तुस बि कोइ अछा आर्टिकल, पुराणि या नौइ कथा, कहावत, कविता, त नौवे धीत (पांगवाडि अन्तर) लिख कइ छपां जे हेंचदे दिए।

◆ अस किलाड केन्द्रीय पुस्तकालय, त बजार ठेके भैड हरिरामे दुकान अन्तर तुबारि ड्रॉप बॉक्स पुठ बि अपु सझाव ओर आर्टिकलस रखुं जे सुविधा क्रिओ असि।

☎ 9418431531


☎ 9418429574

☎ 9418329200

☎ 9418411199

☎ 9418411599

### गरमी अन्तर माछि मुसीबत




एचेल पांगेई अन्तर गरमी असि। त सोब मेहणु बग-बघुई कम, त सौ रोजगारे कम जुएई मस्त असे। इस टेम अगर कोइ यक रोज बि बिमार भुआ त सुआ कम रेहि घेन्तु। एचेल मेहणु दस्त त होरि पेटे बिमारी सुआ भुन्ति। एन्हि बिमारी फेलाणे जिम्मेवार भुन्ति 'माछि'। त चले, इस फेरि माछि बारे धिक पता कते त इ विचार कते कि कीं कई कइ इन्हि केआं बचुण

माछि जिन्देगी सिर्फ चोउर हफते जे भुन्ति त इस बुछ तेन्हि चोउर पडाव जुएई घेण एन्तु। इसे मतलब ई असु कि माछि अपु जिन्दगी अन्तर चोउर शकल धरति। पेहला पडाव अन्तर से अनुण भुन्ति। दोके पडाव अन्तर से रुइयांलु लोलुड भुन्तु, टेके पडाव अन्तर से मठुड लोलुड भुन्तु त चौथे पडाव अन्तर से यक उडरणे बाडि माछि भुन्ति। शोध कई कइ पता लग गो असा कि कोइ 85% माछि अनुण त मठुड लोलुड पडाव अन्तर भुन्ति त सिर्फ 15% माछि चौथि पडाव अन्तर भुन्ति। माछि मुशक सुन्घ कई अपु खांणे चीजे पता लान्ति। माछि खाण बि मेहणु ई असु। पर तेस केआं शुकि रौठि न खेईति त जपल बि तस खाण भोल त से अपु थूक रौठि अन्तर छई कई से पाणीं बणान्ति त तेस चुशति। से सुआ खान्ति त हगती बि रेहन्ति। इसे मतलब ई भुआ कि माछि जपल बि हें खांणे चीज अन्तर विशित त से पेहले अपु थूक तठि छति त पता अपु गुह बि छति। माछि गरमी मोसम तीं ट्यारा भुन्ता। से गरमी अन्तर सुआ अनुण देन्ती। अनुण देण जे से गरमी जगा, जीं भिथी स्याण, गुह, थूक, शडो सब्जि, खचरे मल त होरे गन्दे जगा तोपती। से यक साथ कोई 500 अनुण देन्ती।

माछि हर वकत खाणे चीज त गन्दी चीज बुछ उडरती रेहन्ती। इस जुएई से बिमारी फैलान्ती। तेन्हि जुए कम से कम पन्जा केआं खडि बिमारी फैलाणे बाडे जीवाणु भुन्ते। त जपल बि से हें रौठि, शाग दुध त होरे खाणे चीज अन्तर विशती त से ना कि सिर्फ दस्त बाडि जीवाणु आणते बल्कि से टाइफॉइड, हैजा, टि.बी. त ऐन्थ्रैक्स बाडि जीवाणु बि आणते। तउं त गरमी अन्तर असि घडि घडि पेटे बिमारी लगति त होरि बिमारी बि भुन्ति।

अबुल बिशुण जे अस माछि संख्या कम करुण असि। त एस जे असि माछि केआं ज्यादा माछि अनुण त लोलुड के धे ध्यान देण एन्ता। क्यों कि इन्के संख्या सुआ भुन्ति। माछि मारणे दवा, डि.डि.टि त नीमे तैल बि इस्तेमाल कई सकते। माछि पुठ नियन्त्रण यके रोजे ना करिन्ता। पर अन्हि रोकुण जे अस कुछ प्रतिबंधक कम कई सकते। जीं कि अस अपु गीहे भेड बइ सफाई रख सकते। गन्द-फन्द पथि सकते। दुआरि जुओई जालि लाई सकते, खाणे पीणे चीजे ढकि कई रख सकते, रौठि अस तिचाण कई खाई सकते। माछि दूर लागे सोबि केआं बडिआ तरीका सा 'सफाई', अपु सफाई, अपु गीहे सफाई त अपु आस-पडोसे सफाई। ए यक मेहणु या यक परिवारे कम न भीन्था। ए पुरे ग्रांए कम भीन्था। अगर सोब मी कई अपु आस-पडोसे सफाई रखियेल त माछि जड केआं खतम भोई घेन्ति। एईए अस सोह कते कि अपु आस-पडोस साफ रखते त माछि दूर कते।



### स्याणा जिम्मदार त तसे कुतर

यक ग्रां अन्तर यक स्याणा जिम्मदार थिया। त तसे यक जुएल बि थी। पर तसे कोइ बि गभुरु नेओथा। तसे यक कुतर थिया। तस से बडा-भारी ट्यारा थिया। तस ग्रां अन्तर दुई दुष्ट धाणि त जुएल बि थिए।

यक रोज से कुतर अपु मालिक जुओई बग गा। त तठि से कुतर बग खनण लगा। त तथ बग अन्तरा सोने सिक्के निसुण लगे। त से मालिक कुछ टेमे बाद खरा धनी भोई गा। ऐ बोक जिखेई तेन्ही दुष्ट धाणि

(Cont....) जुएल पता चला त तन्के दुहेई के मन अन्तर आग लग गई। से तस कुतर बन्हि कई अपु गी जे घिन गो। त से तस कुतर खरु खरु खिलाण लगे। पर तेन कुतरे तन्के खरि खरि रोटि न खेई। यक रोज से कुतर तेनि यक बुटे पढे घिन गा। त बग खनण लगा। तेनि दुहि दुष्ट मेहणु सोचु कि ए कुतर असि बि धनी बणांता। जपल से तेस खोपर खनते त खोपर अन्तरा यक मरो बलाउ निसतु जैस कियां बडि-भारि कुस्तरिं मुश्क एन्ति। त से दुहे तठिया नश घेन्ते त लहर अन्तर तस कुतर मार छान्ते। त से तस कुतर तस बुटे पढे पथि छान्ते ।

पता से मालिक तस बुटे ओखलि बणाता। त जपल से तस अन्तर चोउ कुटण जे छता त से चाउए रो सुना बण घेन्ते । त से बडा-भारि शेठ बण घेन्ता। पता जपल ओन्हि एस बोकि पता चलता त से स्याणा जिम्मदार कियां तस ओखलि खरिद छान्ते । पर जपल से ओखलि अन्तर चोउ रो छते त से किडे बण घेन्ते त से तेस ओखलि फुकि छान्ते ।

इ शुण कई, से स्याणा जिम्मदार तेनि कियां पटास मगुं जे घेन्ता। वापिस ऐणे टेम, अगर कियां तन्के राजा त मन्त्री वगैरा ऐण लगो भुन्ते। त से स्याणा जिम्मदार यक बुटे पुठ चढता। त जिखेई राजा अगर जे घेन्ता त से तेन्हि पुठ पटास फटान्ता त से फियूडु बण घेन्तु । इ हेर कई, से दुष्ट मेहणु बि बुटे पुठ चढते त पटास फटाण लगते। त से पटास उडरि कई राजे आसि अन्तर घेई घेन्तु त राजे लहेर ऐई घेन्ति। राजा बोलुण लगता, “ केसे हिम्मत भुई मोउ पुठ पटास फटाणे”। त तपल राजा हेरता कि दुई दुष्ट मेहणु बुटे पुठ चढो असे त तन्के हतेउ जुए पटास लगो असु। त तसे मन्त्री तेन्हि दुष्टि टान्ते त मडते। त तेन्हि मडी कइ नह अन्तर फटाई छान्ते।..... लेखक - देव राज राण, परमसा।

### कुछ खास खबर

- ◆ पांगेई अन्तर चुनाव 10 त 12 जुने भुई गो। पांगेई केआं जिला परिषद जे मीनाक्षी ठाकुर , त चेयर मैन अमर देई बणि गई।
- ◆ 108 आपातकालीन सेवा अब पेंगेई अन्तर एई गो असि। उम्मीद असि कि ए पेंगेई जे बढ़िया साबित भुन्ती।
- ◆ साच पास जोत खुलणे बोलि पंगेई बाडि हटणे जे सुआ सुकतु भुई गो असु।
- ◆ कुठाह बाडि हराई कई पेरकुण विजेता 'हिमालयान ब्रदज' दुबारि शहीद दीनानाथ ट्रॉफी जीती।

कुआ चश्मा दुकानदार जे .....

By Shubham



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

आपकी शहर में जल्दी खुल रहा है

# कशिश् लेडीज ब्युटी पार्लर

आपकी असली निखार, कशिश् ब्युटी पार्लर के साथ

चौकि बाजार, किलाड़ ☎ 9459643463, 9459076050

हेयर ड्रेसिंग, हेयर कॉलरिंग, मेहन्दि, श्रेडिंग, वाक्सिंग, फेसियल, ब्लीच, मैनीक्योर,

पेडीक्योर, ब्राइडल मेक्-अप।

सबसे अब्बुल हेरण जे कशिश् ब्युटी पार्लर जरूर आए